



Kako iskoristiti mjesec šaban i pripremiti se za ramazan (Mekka)

Hatib: dr. Abdullah ibn Avad el-Džuheni

6. šaban 1445. po Hidžri / 16. februar 2024.

Sva hvala i zahvala pripadaju Allahu. Njega hvalimo, od Njega pomoć i oprost tražimo, i Njemu se utječemo od zla naših duša i naših loših djela. Koga Allah uputi, niko ga u zabludu ne može odvesti, a koga On u zabludi ostavi, niko ga ne može uputiti. Svjedočim da nema boga osim Allaha, Jedinog, Koji nema druga, i svjedočim da je Muhammed, sallallahu alejhi ve sellem, Njegov rob i poslanik, neka su na njega i njegovu porodicu Allahova milost, spas i oprost.

O vi koji vjerujete, bojte se Allaha istinskom bogobojažnošću i nipošto ne umirite osim kao muslimani!" (Ali Imran, 102)

"O ljudi, bojte se Gospodara svoga, Koji vas je stvorio od jedne osobe, od koje je njen par stvorio, a od njih dvoje mnoge muškarce i žene rasijao. Bojte se Allaha, Čijim imenom jedni druge molite, i čuvajte rodbinske veze. Allah vas, doista, nadzire." (En-Nisa, 1)

"O vjernici, bojte se Allaha i govorite samo istinu, On će vas za vaša dobra djela nagraditi i grijehе vam vaše oprostiti. A onaj ko se Allahu i Poslaniku Njegovu bude pokoravao – postići će ono što bude želio." (El-Ahzab, 70–71)

Najistinitiji govor je Allahova Knjiga, a najbolja uputa je uputa Muhammeda, sallallahu alejhi ve sellem. Najgore stvari u vjeri su nove stvari, svaka nova stvar u vjeri je novotarija, svaka novotarija vodi u zabludu, a svaka zabluda vodi u Vatru.

Znaјte, ljudi, da je bogobojažnost najbolja poputnina i najbolja opskrba. Razmislite o stvarnosti ovog svijeta, koliko je lijepih građevina uništeno nakon njihove izgradnje, i koliko je ljudi, kojima su one date, bilo sretno zbog toga, a kratko nakon toga napustili su ih ili su one napustile njih. Kada to zna, svaki razuman čovjek pohrlit će zadovoljstvu svoga Gospodara, i nastojat će da učini što više dobrih djela i što više





dobročinstva. Uzvišeni kaže: "... i nastojte zaslužiti oprost Gospodara svoga i Džennet prostran kao nebesa i Zemlja, pripremljen za one koji se Allaha boje, za one koji, i kad su u obilju i kad su u oskudici, udjeljuju, koji srdžbu savlađuju i ljudima praštaju – a Allah voli one koji dobra djela čine." (Ali Imran, 133–134)

"Nadmećite se da u Gospodara svoga zaslužite oprost i Džennet, prostran koliko su nebo i Zemlja prostrani, i pripremljen za one koji u Allaha i poslanike Njegove vjeruju. To je Allahova blagodat koju će dati onome kome On hoće; a u Allaha je blagodat velika." (El-Hadid, 21)

Istinsko natjecanje treba da bude u dobrim djelima, makar ih vidjeli malim i neznatnim, i u udaljavanju od grijeha, makar ih, u svojim dušama, smatrali beznačajnim, kako čovjek ne bi posustao u činjenju onoga što mu je naređeno, izvršavanju naredbi i ostavljanju zabrana, i kako ne bi potcijenio ni najmanji prekršaj, jer možda upravo taj prekršaj bude uzrok vječne propasti i nesreće. Zato, natječite se u dobru, da biste postigli Njegov Džennet i zadovoljstvo.

O muslimani, zahvaljujemo Allahu, Koji je, Svojom voljom, odlikovao neka vremena i mjesta nad drugima. Kao što je odlikovao određene sate i dane, i ispunio ih blagodatima i darovima, isto tako, odabrao je mjesec šaban, među posebno vrijednim mjesecima, da bude prethodnica uzvišenog mjeseca, koji briše grijeha, i u kojem posebno dolazi do izražaja milost Poznavaoaca nevidljivog, i u kojem su objavljeni jasni propisi, i u kojem su se Poslaniku, sallallahu alejhi ve sellem, desile mnoge mudžize – nadnaravna djela.

Šaban je mjesec u kojem se uvećava dobro i nižu dobra djela, i ta vrijednost data mu je na dar. Buhari i Muslim bilježe da je Poslanik, sallallahu alejhi ve sellem, postio cijeli šaban, a u jednoj verziji kaže se: "osim mali broj dana". Razlog zbog kojeg je postio veliki broj dana u šabanu, a ne u drugim mjesecima, jeste taj što se u šabanu uzdižu djela Gospodaru svjetova, a Poslanik, sallallahu alejhi ve sellem, volio je da njegova djela budu uzdignuta Allahu dok posti.





To je, također, mjesec prema kojem je većina ljudi nemarna, između redžeba i ramazana, kao što se navodi u predaji koju Nesai i Ahmed bilježe od miljenika i sina miljenika Usame ibn Zejda, radijallahu anhumu.

Svaki musliman trebao bi u ovom mjesecu činiti koliko je moguće više dobrih djela i dobročinstva, makar da posti nekoliko dana, nadajući se kabulu i oprostima od Plemenitog i Darežljivog.

Enes, radijallahu anhu, kazao je: "Kada bi nastupio mjesec šaban, muslimani bi se potpuno posvećivali Kur'anu, učili su ga i izdvajali su zekat iz svog imetka, kako bi osnažili slabe i siromašne za post ramazana. U nekim predajama mjesec šaban nazvan je "mjesecom Kur'ana". Poznato je da je učenje Kur'ana preporučeno u svakom vremenu, ali je potvrđenije u blagoslovljenim i odabranim vremenima i na časnim mjestima.

Najvrednije dobro djelo kojim se uvećavaju deredže, stepeni kod Allaha, jeste tevhid – obožavanje Allaha, kroz iskreno i čisto vjerovanje da je On jedini Gospodar i jedini istinski Bog, dostojan obožavanja, vjerovanje u Njegova savršena imena i svojstva, obavljanje namaza, davanje milostinje siromašnoj rodbini, udovicama, jetimima, siromašnima i potrebnima.

Bojte se Allaha, o muslimani, zahvaljujte Mu što vas je poživio do ovog odabranog mjeseca, i znajte da se vremena razlikuju u vrijednosti, pa ih povežite dobrim djelima i ispunite pokornošću, i da duše naginju lijenosti i komociji, pa ne udovoljavajte njihovim prohtjevima i nastojte ih ukrotiti, i da dunjaluk nije kuća stalnog boravka, pa samo prođite kroz njega i ne dozvolite da vas obmane. Pametan i razborit čovjek ne osjeća slast u boravku na dunjaluku, klonite se njegovog društva i ignorišite ga, a trudite se da iskoristite odabrana vremena, mimo uobičajenog, i uzmite iz njegovih vrijednih riznica ono što će vam koristiti na Sudnjem danu.

Bojte se Allaha, o muslimani, onako kako se treba bojati, budite svjesni Njegovog nadzora u tajnosti i javnosti, pomažite se u dobročinstvu i bogobožnosti, a nemojte





se pomagati u grijehu i nasilju, samo se Njemu obraćajte za ispunjenje vaših potreba i od Njega tražite pomoć, a ne od drugih.

Onaj ko se istinski osloni na Allaha, On mu je dovoljan, a ko se osloni na nekoga drugog, Allah će ga prepustiti njemu, a onaj ko bude prepušten nekome drugom, mimo Allaha, propao je.

Čvrsto se držite Allahove Knjige, On će vas uputiti na ono što je najbolje, i držite se sunneta vašeg Vjerovjesnika, sallallahu alejhi ve sellem, u onome što je za vas i protiv vas, uspjeh ćete i postići vječnu sreću.

Zatim, znajte da vam je Allah naredio da donosite salavate i selame na Njegovog Vjerovjesnika, pa je rekao u mudroj Objavi: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!" (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

